



PRAVILNIK O NAGRADAMA ZA STUDENTE UNIVERZITETA "DŽEMAL BIJEDIĆ" U MOSTARU

Mostar, decembar 2017. godine

Na osnovu člana 54. stav (1) tačka d) Zakona o visokom obrazovanju u Hercegovačko-neretvanskom kantonu (Službene novine Hercegovačko-neretvanskog kantona broj:4/12), člana 72., a u skladu sa članom 170. Stav (4) Statuta Univerziteta, na prijedlog rektora Univerziteta, Senat Univerziteta "Džemal Bijedić" u Mostaru, na svojoj 70. sjednici, održanoj 28. 12. 2017. godine, donio je

PRAVILNIK O NAGRADAMA ZA STUDENTE UNIVERZITETA "DŽEMAL BIJEDIĆ" U MOSTARU

UVODNE ODREDBE

Član 1.

Ovim Pravilnikom utvrđuju se vrste nagrada koje se dodjeljuju studentima Univerziteta "Džemal Bijedić" u Mostaru (u daljem tekstu Univerzitet), postupak za njihovo dodjeljivanje, kao i nadležni organ za dodjeljivanje nagrada.

Član 2.

(Vrste nagrada)

- (1) Najboljim studentima Univerziteta dodjeljuje se nagrada.
- (2) Nagrada se dodjeljuje studentima s najboljim uspjehom na I i II ciklusu studiju, studentima za najbolja naučna ili umjetnička ostvarenja, te studentima koji su na druge načine doprinijeli razvoju i afirmaciji Univerziteta.
- (3) Studenti mogu dobiti:
 - Rektorova nagrada
 - Nagradu dekana odnosno nagradu voditelja univerzitetskog studija

NAGRADA REKTORA

Član 3.

(Nagrada rektora)

Nagrada rektora dodjeljuje se:

- studentima s najboljim uspjehom,
- studentima za najbolja naučna i umjetnička ostvarenja.

Član 4.

(Sadržaj Nagrade rektora)

- (1) Nagrada se sastoji od Povelje i novčanog iznosa.
- (2) Povelja studentima izrađuje se na visokokvalitetnom papiru, dimenzija 21 x 29,7 cm, a sadrži: naziv i znak Univerziteta, naziv priznanja (nagrada rektora), ime i prezime studenta, kratko obrazloženje, broj i datum izdavanja, potpis rektora, kao i pečat Univerziteta.
- (3) Visinu novčane naknade utvrđuje Upravni odbor Univerziteta, na prijedlog Senata Univerziteta.

- (4) Ukupan novčani iznos sredstava namijenjenih za Nagradu rektora obezbjeđuje se finansijskim planom za raspodjelu sredstava iz vlastitih prihoda Univerziteta.

NAGRADA REKTORA ZA STUDENTE S NAJBOLJIM USPJEHOM

Član 5.

(Studenti s najboljim uspjehom)

- (1) Nagrada rektora za studente s najboljim uspjehom dodjeljuje se studentima Univerziteta svake akademske godine.
- (2) Nagradu za studente s najboljim uspjehom mogu dobiti studenti koji su završili I ili II ciklus studija.
- (3) Nagradu može dobiti najviše po jedan student sa I ciklusa studija, te po jedan student II ciklusa studija svakog fakulteta i po jedan student I i II ciklusa sa univerzitetskih studijskih programa.
- (4) Naučno-nastavna vijeća fakulteta i studijskih programa Univerziteta dostavljaju svoje Prijedloge kandidata za Nagradu rektora za studente s najboljim uspjehom, s odgovarajućim obrazloženjem, najkasnije do 15. januara tekuće godine.
- (5) Nagrade uručuje rektor na svečanoj akademiji povodom dana Univerziteta.

Član 6.

(Uslovi za dobijanje Nagrade)

- (1) Uslovi za dobijanje Nagrade rektora za studente s najboljim uspjehom jesu:
 - za studente I ciklusa prosječna ocjena 8 ili više, u toku cjelokupnog I ciklusa studija.
 - za studente II ciklusa prosječna ocjena 8 ili više, u toku cjelokupnog I i II ciklusa studija
 - da tokom studija nije ponavljao niti jednu godinu studija;
 - da je do kraja prethodne akademske godine (30.9.) položio sve ispite.
- (2) Pored uslova iz stava 1. ovog člana, trebaju se razmotriti i drugi uslovi koji mogu imati uticaj na izbor:
 - aktivnosti u nastavnom procesu (demonstrator);
 - učešće u sportskim aktivnostima;
 - učešće u kulturnim aktivnostima;
 - rad u studentskim organizacijama;
 - uspjeh na takmičenjima;
 - aktivno učešće u međunarodnoj razmjeni studenata;
 - drugi uslovi.
- (3) Konačnu Odluku o dodjeljivanju Nagrade rektora donosi Senat na prijedlog Rektora.

NAGRADA REKTORA ZA NAJBOLJA NAUČNA I UMJETNIČKA OSTVARENJA

Član 7.

(Nagrada rektora za najbolje naučno i umjetničko ostvarenje)

- (1) Radi poticanja naučno-istraživačkog i umjetničkog rada dodjeljuje se Nagrada rektora za najbolje naučno i umjetničko ostvarenje, kojom se nagrađuje najbolji studentski rad iz područja nauke, odnosno umjetnosti.
- (2) Godišnje se može dodijeliti najviše 1 (jedna) nagrada za najbolje naučno i umjetničko ostvarenje za studente I ciklusa studija, te 1 (jedna) nagrada za najbolje naučno i umjetničko ostvarenje za studente II ciklusa studija.

Član 8.

(Pravo kandidiranja)

Pravo kandidiranja za Nagradu rektora za najbolje naučno i umjetničko ostvarenje imaju studenti svih studijskih programa, I i II ciklusa studija Univerziteta.

Član 9.

(Konkurs za dodjelu Nagrade rektora za najbolje naučno i umjetničko ostvarenje)

- (1) Konkurs za dodjelu Nagrade rektora za najbolje naučno i umjetničko ostvarenje raspisuje se početkom svake akademske godine.
- (2) Konkurs se objavljuje na oglasnim pločama organizacionih jedinica i na web-stranici Univerziteta.

Član 10.

(Naučno i umjetničko ostvarenje)

- (1) Studenti mogu prijaviti rad iz područja nauke, odnosno umjetničko ostvarenje, jednog ili više autora.
- (2) Studenti ne mogu prijaviti završni ili diplomski rad kao naučno, odnosno umjetničko ostvarenje.

Član 11.

(Komisija za izbor najboljeg prijavljenog rada)

- (1) Radovi koji se prijavljuju predaju se na protokol Univerziteta, s naznakom "Prijava za dodjelu Nagrade rektora za najbolje naučno i umjetničko ostvarenje".
- (2) Komisiju za izbor najboljeg prijavljenog rada čine prodekani za naučno - istraživački rad i prorektor za naučno - istraživački rad. Komisijom predsjedava prorektor za naučno-istraživački rad.
- (3) Komisija nakon pregleda radova utvrđuje Prijedlog redoslijeda radova kojeg dostavlja rektoru.
- (4) Konačnu odluku o dodjeli Nagrade donosi Senat Univerziteta na prijedlog rektora.

Član 12.**(Objava Odluke o dodjeli Nagrade rektora za najbolje naučno i umjetničko ostvarenje)**

Odluka o dodjeli Nagrade rektora za najbolje naučno i umjetničko ostvarenje, s podacima o studentu i nagrađenom radu, objavljuje se na oglasnim pločama organizacionih jedinica Univerziteta i na web-stranici Univerziteta, najkasnije 15 dana prije njezine dodjele.

NAGRADA DEKANA/VODITELJA UNIVERZITETSKOG STUDIJA**Član 13.****(Nagrada dekana odnosno voditelja univerzitetskog studija)**

Nagrada se dodjeljuje studentima s najboljim uspjehom.

Član 14.**(Sadržaj Nagrade)**

- (1) Nagrada se sastoji od Povelje.
- (2) Povelja studentima izrađuje se na visokokvalitetnom papiru, dimenzija 21 x 29,7 cm, a sadrži: naziv Univerziteta, naziv fakulteta, znak Univerziteta, naziv priznanja (nagrada dekana odnosno voditelja univerzitetskog studija), ime i prezime studenta, kratko obrazloženje, broj i datum izdavanja, potpis dekana odnosno voditelja studijskog programa, kao i pečat fakulteta odnosno studijskog programa Univerziteta u Mostaru.

Član 15.**(Studenti s najboljim uspjehom)**

- (1) Nagrada za studente s najboljim uspjehom dodjeljuje se studentima svake akademske godine za prethodnu godinu studija.
- (2) Nagradu dobijaju studenti s najboljim uspjehom sa I i II ciklusa studija
- (3) Nagrade uručuje dekan fakulteta odnosno voditelj univerzitetskog studija na prigodnoj svečanosti koju organizuje fakultet odnosno univerzitetski studij.

Član 16.**(Uslovi za dobijanje Nagrade)**

- (1) Uslov za dobijanje Nagrade za studente s najboljim uspjehom jeste najmanja prosječna ocjena 8 ili više, ostvarena u prethodnoj godini studija.
- (2) Pored uslova iz stava 1. ovog člana student mora ispunjavati i dodatne uslove:
 - da tokom studija nije ponavljao niti jednu godinu studija;
 - da je položio sve ispite iz prethodne godine studija do 30.09.;
- (3) Ako uslove iz stavova 1. i 2. ovog člana ispunjava više studenata, onda Nagradu dobija 10 studenata za I i II ciklus sa fakulteta odnosno univerzitetskog studija.
- (4) Konačnu odluku o dodjeli nagrade donosi Naučno-nastavno vijeće fakulteta odnosno univerzitetskog studijskog programa na prijedlog dekana odnosno voditelja i ista se objavljuje na oglasnoj ploči fakulteta odnosno studijskog programa i web stranici Univerziteta.

PRELAZNE I ZAVRŠNE ODREDBE

Član 17.

(Evidencija o dodijeljenim nagradama)

- (1) Službe Rektorata Univerziteta obavezne su voditi posebnu evidenciju o dodijeljenim nagradama Univerziteta "Džemal Bijedić" u Mostaru.
- (2) Službe organizacionih jedinica obavezne su voditi posebnu evidenciju o dodijeljenim nagradama fakulteta odnosno studijskih programa Univerziteta "Džemal Bijedić" u Mostaru.

Član 18.

(Izmjene i dopune Pravilnika)

Izmjene i dopune ovog Pravilnika stupaju na snagu danom donošenja.

**Predsjedavajući Senata
Univerziteta "Džemal Bijedić" u Mostaru**

Broj: 101-1-2896/17

prof. dr. Sead Pašić, rektor

SADRŽAJ

UVODNE ODREDBE	2
NAGRADA REKTORA	2
NAGRADA REKTORA ZA STUDENTE S NAJBOLJIM USPJEHOM	3
NAGRADA REKTORA ZA NAJBOLJA NAUČNA I UMJETNIČKA OSTVARENJA	4
NAGRADA DEKANA/VODITELJA UNIVERZITETSKOG STUDIJA	5
PRELAZNE I ZAVRŠNE ODREDBE	6



Broj: 101-5660/25

Mostar, 25.12.2025.godine

Na osnovu članova 72. i 258. Statuta Univerziteta „Džemal Bijedić“ u Mostaru, te prijedloga rektorice Univerziteta „Džemal Bijedić“ u Mostaru, broj: 101-1-5513/25 od 17.12.2025. godine, Senat Univerziteta, na 179. sjednici održanoj 25.12.2025. godine, donio je

ODLUKU

o izmjeni i dopuni Pravilnika o nagradama za studente Univerziteta „Džemal Bijedić“ u Mostaru

I

Mijenjaju se članovi 5. i 6. Pravilnika o nagradama za studente Univerziteta „Džemal Bijedić“ u Mostaru i glase:

Član 5.

(Studenti s najboljim uspjehom)

- (1) Nagrada rektora za studente s najboljim uspjehom dodjeljuje se studentima Univerziteta svake akademske godine.
- (2) Nagradu za studente s najboljim uspjehom mogu dobiti studenti koji su završili I, II ciklus studija i integrirani studij.
- (3) Nagradu može dobiti po jedan student sa I ciklusa studija i po jedan student sa II ciklusa studija svakog fakulteta/univerzitetskog studija i po jedan student sa integriranog studija.
- (4) Naučno - nastavna vijeća fakulteta i studijskih programa Univerziteta dostavljaju rektoru svoje prijedloge kandidata za Nagradu rektora za studente s najboljim uspjehom, s odgovarajućim obrazloženjem, najkasnije do 15. januara tekuće godine, putem protokola.
- (5) Nagrade uručuje rektor na svečanoj akademiji povodom dana Univerziteta.

Član 6.

(Uslovi za dobijanje nagrade)

- (1) Uslovi za dobijanje Nagrade rektora za studente s najboljim uspjehom jesu:
 - za studente prvog ciklusa studija prosječna ocjena 8 ili više, u toku cjelokupnog I ciklusa studija;
 - za studente II ciklusa studija prosječna ocjena 8 ili više, u toku cjelokupnog I i II ciklusa studija;
 - za studente integriranog studija prosječna ocjena 8 ili više, u toku cjelokupnog studija;
 - da tokom studija nije ponavljao niti jednu godinu studija;
 - da je do 30.11. tekuće godine položio sve ispite i odbranio završni rad na I ciklusu studija, odnosno diplomski rad na II ciklusu studija/integrisanom studiju.
- (2) Pored uslova iz stava 1. ovog člana, trebaju se razmotriti i drugi uslovi koji mogu imati uticaj na izbor:
 - aktivnosti u nastavnom procesu (demonstrator);
 - učešće u sportskim aktivnostima;
 - učešće u kulturnim aktivnostima;
 - rad u studentskim organizacijama;
 - uspjeh na takmičenjima;



- aktivno učešće u međunarodnoj razmjeni studenata;
- drugi uslovi.

(3) Konačnu Odluku o dodjeljivanju Nagrade rektora donosi Senat na prijedlog rektora.

II

Odluka stupa na snagu danom donošenja.

**PREDSJEDAVAJUĆA SENATA
UNIVERZITETA „DŽEMAL BIJEDIĆ“ U MOSTARU**

prof. dr. Alena Huseinbegović, rektorica



Dostaviti:

1. Fakultetima
2. Univerzitetskim studijima
3. Referentu za odnose s javnošću (za objavu na web stranici)
4. a/a